

Bunamain 24 delicts per di

Grischun: Statistica criminala 2016

DA GION NUTEGN STGIER / ANR

■ **Il dumber dals delicts criminals en noss chantun è sa diminui il 2017. Registrà han ins total 8541 delicts e quai èn 379 damain che l'onn 2016. Ils pli blers delicts penals ha i dà sco gia ils davos onns a Cuira e conturn. Er en Svizra è il dumber dals delicts sa reduci e quai per 6%. Ier ha la polizia chantunala dal Grischun preschentà a Cuira la statistica criminala da la polizia 2017. Gianfranco Albertini, il schef da la polizia criminala da noss chantun, ha pudì preschentar cifras plaschavlas en cumparaziun cun l'onn precedent. La realità è che l'onn 2017 èn vegnids registrads en il Grischun damain delicts che l'onn avant. Quai correspunda al trend svizzer, ha menziunà Albertini. En noss chantun datti però pulitas differenzas tranter las regions ch'èn pertutgadas da delicts.**

In augment da sis cas

En il chantun Grischun èn vegnids registrads l'onn passà 8541 delicts. Quai èn 379 damain che l'onn 2016. La part la pli gronda èn acts chastiabels cunter il cudesch penal svizzer, numnadamain 6287 (onn precedent 6870). Per cumparagliar: L'onn 2009, cura che la statistica criminala da la polizia è vegnida fatga per l'emprima giada tenor criteris da registraziun unifitgads en Svizra, èn vegnids registrads en noss chantun 8156 acts chastiabels cunter il cudesch penal svizzer. Tar ils delicts da violenza grevs è vegnì registrà in augment da sis cas envers l'onn precedent e quai da 36 sin 42 cas. Quai èn dus mazzaments, 27 blessuras corporalas grevas e 13 violaziuns. Els sajan ve-



Gianfranco Albertini, il schef da la polizia criminala da noss chantun.

FOTO G. N. STGIER

gnids sclerids per 100%, ha menziunà il schef da la polizia criminala grischuna. 92% da tut ils delicts da violenza (onn precedent 91%) èn vegnids sclerids.

Relaziuns da famiglia: 238 delicts

La gronda part dals delicts da violenza èn blessuras corporalas levas, acts violents, baruffas, constringiments, smanatschas e violenza/smanatscha cunter funcziunaris. Tar las baruffas sto vegnir registrà in

augment da 27 sin 48 cas, tar ils cas da violenza/smanatscha cunter funcziunaris in augment da 24 sin 41 cas. 228 delicts da violenza èn succedids pervia da relaziuns da famiglia, quai ch'èn 57,5% dals delicts da violenza. L'onn 2016 eran quai anc 40,5%.

Damain enguladitschs

L'onn 2017 èn vegnids registrads 1861 enguladitschs, quai che correspunda

ad ina sminuziun da 9%. 415 da quels èn stads enguladitschs cun infracziun. Il 2009, l'onn cun il cumenzament da la statistica criminala da la polizia, eran quai tuttina anc 2995 enguladitschs, da quels 592 enguladitschs cun infracziun. La quota da scleriment en quest sector importa 23,8%, l'onn precedent 24,0%. Da tut ils acts chastiabels cunter il cudesch penal svizzer ha la polizia chantunala dal

Grischun sclerì 40,7%. Tar ils delicts cunter il corp e cunter la vita sa chat-ta la quota da scleriment tar 92,5%. Tranter las personas inculpadas en il sector dal cudesch penal svizzer dattan ils umens tranter 15 e 35 onns spezialmain savens en egl a la polizia.

Danovamain las trais medemas vischnancas

Ils pli blers delicts penals ha i dà a Cuira cun in total da 1835 cas, quai ch'è tuttina in minus da 16%. Tavau suonda sin il segund plaz cun total 404 delicts, in minus da 17% e lura Landquart cun 316 cas da delicts, 8% damain che anc l'onn 2016. A Domat giaschan quels tar in dumber da 252 cas cun in minus dad 11%. Damain delicts criminals han ins er già en la vischnanca Ilanz/Glion cun in total da 71 cas, tuttina ina reducziun da 42%. A Mustér èn quels dentant s'augmentads da 39 cas sin da nov 52 cas (in plus da 33%). Dals total 1278 inculpads enconuschents eran 730 Svizzers ed ils auters 548 per gronda part dal Portugal, da l'Italia e da la Germania ubain dad auters pajais.

Naziunal damain delicts

Er en Svizra ha i l'onn passà dà 6% damain irrupziuns cun in total da 439 001 cas, quai ch'èn 120 cas per di. Involvad èn quels cas eran 76% umens. Tenor chantuns e sin 1000 abitants è Basilea citad a la testa cun 113,5 delicts avant Genevra cun 102,8 cas sin ina populaziun da 1000 personas. Guardà naziunal èn 79% dals delinquentes da chasa en Svizra.